

Ukiut tamaasa ullormi 13. September Naalakkersuisut paasisitsiniaanermik ingerlatsisarnissaannik inatsisartut aalajangiiffigisassaattut siunnersuut. Paasisitsiniaanermi plastikkit ataasiaannarlugit atortakkat kingunipiluunik qaammarsaanermik siunertaqassaaq. Paasisitsiniaanerup siunertarissavaattaaq plastikkip pinngortitamut innarliisarnerrata qaammarsaatigineqarnera kiisalu plastikkimik atuinerup annikillisarniarnera siunertaralugu innuttaasunut periarfissanik tikkuussinikkut plastikkinik atuinerup annikillisarneqarsinnaanera. (Inatsisartunut ilaasortaq Pipaluk Lyngø Rasmussen, Inuit Ataqatigiit)

Akissuteqaat

(Nunalerinermut, Imminut pilersornermut, Nukissiuutinut Avatangiisinullu Naalakkersuisoq)

Siullermeerinninneq

Siunnersuummut siunnersuuteqartoq Naalakkersuisunit qutsavigaarput.

Pinngortitaaq inuuffigaarput – paarissavarpullu. Nunatsinni nunarsuullu sinnerani plastikkimik immami sineriannilu mingutsitsineq ajornartorsiuterujussuuvoq.

Plastikkimik atuinerup annikillisarneqarnissaa anguniarlugu Naalakkersuisut 2021-mi iliuusissatut pilersaarut akuersissutigaat. Iliuusissatut pilersaarummi sammisassat pingaernerit marluk ilagaat plastikkit ataasiaannarlugit atortakkat paasititsiniaanerillu.

Plastikkitt ataasiaannarlugit atortakkat, soorlu vatpindit, nerinermut atortut ataasiartakkat milluaatillu, pinngortitamit avatangiisinilu plastikkinik mingutsitseqataapput. Kingusinnerpaamik 2023-mi Naalakkersuisut plastikkinik ataasiartakkanik inerteqquteqalersitsissapput. Inerteqquteqarnissap plastikkimik atuinitta annikillisinneqarnissaa siunertaraa. Taakkunungalu taarsiullugu allanik avatangiisinut innarliinngitsunik atuisalissaagut.

Plastikkilli ataasiartakkat inerteqqutigineqarnerat allamik ilaqartariaqarpoq. Inerteqquteqarneq paasisaqarnerlu ingiaqatigiittariaqarput. Ileqqutta allanngortinnissaat pisariaqarpoq. Asimi plastikkinik qimagaasassanngilagut plastikkimillu atuinikinnerulernissarput sungiuttariaqarparput. Taamaattumik inerteqquteqarnissap tungaanut atuutilernissaatalu tungaanut plastikkit ataasiartakkat pillugit ulloq aalajangersimasooq paasititsiniaasooqartarnissaa isumatusaarneruvoq.

Ulloq paasititsiniaaffik Naalakkersuisut suliaannut allanut ilanngullugu pilersaarusiorneqarsinnaavoq taamaalillunilu aningaasaqarnikkut sinaakkutaareersut iluini ingerlanneqarsinnaalluni. Assersuutigalugu Pinngortitap Paarsisui paasititsiniaanermi atorneqarsinnaapput. Nunatsinni inersimasut amerlassusii naapertorlugit misissuinermit Pinngortitap Paarsisui ilisimasaqarfigineraat aperineqarput. Taakkunannga 68 %-iisa paasititsiniaaneq tusarsimavaat, 37 %-iisalu paasititsiniaanerup kingorna pinngortitamit ileqqorisartakkatik allanngortissimallugit oqaatigaat. Amerlagisassaapput taassumalu inerteqquteqarniarnermi aamma paasititsineq qanoq pingaaruteqartiginersooq takutippaa.

Naalakkersuisunit taamatut oqaaseqarluta inassutigaarput siunnersuut akuersissutigineqassasoq.